

Utusan Malaysia Jun 2019

Bil.	Tarikh	Tajuk Berita	Catatan	Muka Surat
1.	3 Jun 2019	Dua beradik didakwa merasuh pegawai polis	Suruhanjaya Pencegahan Rasuah Malaysia (SPRM)	3
2.	9 Jun 2019	Latheefa perlu bukti integriti	Suruhanjaya Pencegahan Rasuah Malaysia (SPRM)	5
3.	10 Jun 2019	Letak jawatan kerana tidak setuju pengurusan syarikat	1Malaysia Development Berhad (1MDB)	7
4.	11 Jun 2019	Sekretariat Suara Rakyat buat laporan SPRM terhadap Menteri Kabinet	Suruhanjaya Pencegahan Rasuah Malaysia (SPRM)	9
5.	11 Jun 2019	Laporan SPRM siasat agensi kawal selia perlombongan bijih besi di Kuala Koh	Suruhanjaya Pencegahan Rasuah Malaysia (SPRM)	11
6.	13 Jun 2019	Isu projek di Lot 7176, penduduk Taman Midah lapor SPRM	Suruhanjaya Pencegahan Rasuah Malaysia (SPRM)	13
7.	17 Jun 2019	Penguat kuasa MBPJ terima suapan?	Suruhanjaya Pencegahan Rasuah Malaysia (SPRM)	14
8.	17 Jun 2019	Dua eksekutif dikaitkan kes 1MDB dipenjara	1Malaysia Development Berhad (1MDB)	16
9.	19 Jun 2019	Penolong jurutera JPS, kontraktor buat tuntutan palsu direman	Suruhanjaya Pencegahan Rasuah Malaysia (SPRM)	17
10.	19 Jun 2019	SPRM Kedah siasat beberapa GLC	Suruhanjaya Pencegahan Rasuah Malaysia (SPRM)	19
11.	20 Jun 2019	Penguat kuasa digantung lakukan tugas luar - Datuk Bandar PJ	Suruhanjaya Pencegahan Rasuah Malaysia (SPRM)	21
12.	21 Jun 2019	Lebih ramai dipanggil SPRM bantu siasatan kes tuntutan palsu	Suruhanjaya Pencegahan Rasuah Malaysia (SPRM)	23
13.	21 Jun 2019	1MDB: Jakel dibayar untuk bekal peralatan kepada masjid	1Malaysia Development Berhad (1MDB)	25
14.	24 Jun 2019	Kilang plastik bungkus semula baja subsidi diserbu	Suruhanjaya Pencegahan Rasuah Malaysia (SPRM)	27
15.	24 Jun 2019	Dua anggota Maritim terima rasuah bulanan diberkas	Suruhanjaya Pencegahan Rasuah Malaysia (SPRM)	29
16.	25 Jun 2019	CEO syarikat pembersihan, ketua jabatan kontrak ditahan kes rasuah kontraktor	Suruhanjaya Pencegahan Rasuah Malaysia (SPRM)	31
17.	25 Jun 2019	Ahmad Zahid selesai beri keterangan di SPRM	Suruhanjaya Pencegahan Rasuah Malaysia (SPRM)	33
18.	26 Jun 2019	Zahid didakwa atas tujuh pertuduhan terima suapan	Suruhanjaya Pencegahan Rasuah Malaysia (SPRM)	35

Bil.	Tarikh	Tajuk Berita	Catatan	Muka Surat
19.	29 Jun 2019	'Kalau RM1, RM2 logik lah tidak tahu'	Suruhanjaya Pencegahan Rasuah Malaysia (SPRM)	37
20.	30 Jun 2019	Buktikan dahulu dana RM270 juta dari 1MDB	1Malaysia Development Berhad (1MDB)	39

1. Dua beradik didakwa merasuh pegawai polis

DUA beradik yang didakwa merasuh polis dihadapkan ke Mahkamah Sesyen Kota Bharu hari ini.

KOTA BHARU - Dua lelaki yang juga merupakan adik beradik dihadapkan ke Mahkamah Sesyen di sini hari ini atas tuduhan memberi rasuah RM10,000 kepada seorang pegawai polis, Isnin lalu.

Tertuduh Wan Mohd Faizal Wan Marzuki, 31, dan abangnya Wan Mohd Fikri, 32, mengaku tidak bersalah selepas pertuduhan dibacakan di hadapan Hakim Zaman Mohd Noor.

Mengikut pertuduhan Wan Mohd Faizal didakwa memberi rasuah wang tunai RM10,000 kepada Inspektor Rozaimi Bakhtiar yang juga Pegawai Kanan Polis Batalion 9 Pasukan Gerakan Am (PGA) Kubang Badak Terengganu.

Wang itu sebagai dorongan kepada Rozaimi untuk berbuat sesuatu berhubung dengan hal ehwal prinsipalnya untuk tidak mengambil tindakan terhadap tertuduh yang ditahan atas kesalahan memiliki 787 kilogram daun ketum.

Kesalahan dilakukan di Kampung Kedondong, Pasir Mas pada jam 10 malam 27 Mei lalu.

Pendakwaan terhadap Wan Mohd Faizal dibuat mengikut Seksyen 17 (b) Akta Suruhanjaya Pencegahan Rasuah Malaysia (SPRM) 2009 yang memperuntukkan penjara sehingga 20 tahun dan denda minimum lima kali ganda jumlah suapan atau RM10,000 mengikut mana-mana yang lebih tinggi.

Wan Mohd Fikri pula didakwa menyediakan wang sebanyak RM10,000 tersebut untuk diberikan secara rasuah kepada polis sama supaya tidak mengambil tindakan ke atas adiknya itu.

Kesalahan didakwa mengikut Seksyen 28 (1) (b) Akta SPRM 2009 dan boleh dihukum di bawah Seksyen 24 Akta sama yang membawa hukuman penjara tidak lebih 20 tahun dan didenda minimum lima kali ganda nilai suapan atau RM10,000 atau mana-mana yang lebih tinggi.

Kes pendakwaan dikendalikan oleh Timbalan Pendakwa Raya Ahmad Adha Amir Yasser Amri, manakala kedua-dua tertuduh tidak diwakili peguam.

Hakim membenarkan kedua-dua tertuduh diikat jamin sebanyak RM10,000 seorang dengan seorang penjamin dan pasport perlu diserahkan kepada mahkaman sebelum menetapkan sebutan semula kew pada 2 Julai depan.

Difahamkan, mereka berdua membayar jaminan tersebut.

2. Latheefa perlu bukti integriti**LATHEEFA KOYA**

KUALA LUMPUR - Ketua Pesuruhjaya Suruhanjaya Pencegahan Rasuah Malaysia (SPRM) yang baharu, Latheefa Koya perlu membuka semula kertas siasatan kes banglo bekas Ketua Menteri Pulau Pinang dan skandal projek terowong bawah laut di Pulau Pinang bagi membuktikan beliau seorang yang berintegriti.

Ketua Penerangan Penaja Wira Parti Bumiputra Perkasa Malaysia (Putra), Meor Mohd. Hilmi Meor Zainun malah mengatakan Latheefa tidak perlu takut dan memihak kepada sesiapa lebih-lebih lagi bekas Pengarah Eksekutif Lawyers for Liberty itu bukan lagi ahli kepada mana-mana parti politik.

Berikut merupakan kenyataan penuh Meor Mohd. Hilmi:

Ketua Pesuruhjaya SPPM yang baharu, Latheefa Koya perlu membuka semula kes banglo dan terowong bawah laut bagi membuktikan beliau seorang yang berintegriti tanpa rasa takut dan tidak memihak kepada mana-mana pihak lebih-lebih lagi beliau kini tidak lagi menjadi ahli mana-mana parti politik.

Kes banglo melibatkan bekas Ketua Menteri Pulau Pinang dan skandal projek terowong bawah laut di Pulau Pinang perlu dibuka dengan segera bagi membuktikan integriti beliau dan pastinya rakyat ingin melihat kes ini diambil tindakan sewajarnya.

Kita pasti dan yakin bahawa dengan perwatakan dan latar belakang pengalaman Latheefa sebagai seorang aktivis masyarakat dan peguam, beliau mampu menjalankan tugas "without fear or favour". Sekiranya kedua-dua kes ini dilihat tidak diambil tindakan sewajarnya maka pelantikan beliau tiada

bezanya dengan pelantikan politik yang lain sebelum ini. Akhirnya bercakap tak serupa bikin seperti ayam berkokok tengah malam.

Umum mengetahui yang pelantikan Latheefa sebagai Ketua Pesuruhjaya SPRM merupakan lantikan politik yang sekaligus tidak menepati janji dalam manifesto Pakatan Harapan (PH).

Namun, Wira Putra mengakui yang Perdana Menteri, Tun Dr. Mahathir Mohamad telah menggunakan kuasa vetonya dalam membuat pelantikan tanpa berbincang dengan Kabinet mungkin kerana Dr. Mahathir sudah mengetahui ada anggota Kabinet tidak ada sijil kelulusan (ada yang dakwa ada sijil tapi tipu dan ada sijil beli) dan tidak juga merujuk kepada Majlis Kepemimpinan PH kerana pada awal Perdana Menteri jangka cadangannya akan dibantah.

Jika PH hilang kepercayan rakyat kerana mungkir janji, pada Perdana Menteri itu bukan masalahnya kerana Pilihan Raya Umum Ke-15 (PRU-15) tokoh lain memimpin PH.

Kita berharap beliau mampu untuk bertindak secara progresif, professional, adil, serta bijaksana dalam kes yang dilaporkan kepada SPRM khususnya laporan bagi kes skandal banglo dan skandal projek terowong bawah laut di Pulau Pinang yang terdedah sebelum ini.

Beliau mesti mampu mendesak Peguam Negara, Tommy Thomas agar semua kes biar mahkamah tentukan salah atau tidak. Mana boleh Tommy tarik balik, batal kes atau tidak membawa pendakwaan atas alasan bukti kukuh tidak mencukupi.

Salah atau tidak adalah tugas Hakim mahkamah membuat keputusan. Bila seseorang sudah dituduh biar mahkamah membersihkan nama yang dituduh. Jika tidak 'mahkamah rakyat' sampai bila menuduh pihak yang dituduh bersalah.

Peguam Negara bukan Hakim. Kes siasatan terowong bawah laut sudah diketahui umum melalui kebocoran kertas siasatan SPRM yg didedahkan secara terperinci oleh blogger, Raja Petra Kamarudin. Inilah cabaran menanti Latheefa. Sama-sama kita tunggu dan lihat.

Wira Putra juga mendesak supaya Tommy juga dapat memastikan siasatan perjalanan inkues Allahyarham Muhammad Adib Mohd. Kassim kerana dikhuatiri ada aktiviti rasuah semasa perbicaraan kes ini berjalan sebab ada saksi yang membuat laporan polis kerana diugut.

3. Letak jawatan kerana tidak setuju pengurusan syarikat

KUALA LUMPUR 10 Jun - Bekas Pengarah Bukan Eksekutif 1Malaysia Development Berhad (1MDB), Tan Sri Ismee Ismail meletak jawatannya di dalam SRC International Sdn. Bhd. sebagai Ahli Lembaga Pengarah kerana tidak bersetuju dengan cara pengurusan syarikat tersebut.



Ismee, 54, yang juga bekas Ketua Pegawai Eksekutif Lembaga Tabung Haji berkata, beliau telah mengemukakan surat perletakan jawatannya itu pada 6 Mei 2014 yang berkuat kuasa secara rasmi bermula pada 15 Ogos tahun sama.

Saksi pendakwaan ke-39 itu dalam pernyataan saksinya berkata, dalam tempoh Mei hingga Ogos tahun berkenaan, beliau tidak lagi aktif melibatkan diri dalam pengurusan SRC International.

"Saya meletakkan jawatan kerana tidak bersetuju dengan cara pengurusan syarikat yang dikendalikan oleh Ketua Pegawai Eksekutif SRC International, Nik Faisal Ariff Kamil terutamanya berhubung akaun dan kewangan syarikat.

"Kebanyakan tindakan berkaitan SRC International dilakukan oleh Nik Faisal selaku Ketua Pegawai Eksekutif," katanya dalam perbicaraan hari ke-21 melibatkan Datuk Seri Najib Tun Razak yang didakwa atas tujuh pertuduhan membabitkan penyelewengan dana SRC International di Mahkamah Tinggi di sini hari ini.

Terdahulu, bekas Ketua Pegawai Eksekutif Kumpulan Wang Diperbadankan (KWAP), Datuk Azian Mohd. Noh tidak menafikan bahawa bekas Perdana Menteri itu mempunyai pengaruh dalam keputusan yang dibuat oleh perbedaan itu berhubung pinjaman kepada SRC International.

Azian ketika disoal semula oleh Timbalan Pendakwa Raya, Datuk Ishak Mohd. Yusoff berkata, selaku Menteri Kewangan dan Perdana Menteri, Najib mempunyai pengaruh ke atas kelulusan permohonan pinjaman yang dibuat pada tahun 2011 dan 2012.

"Pernyataan dalam surat permohonan pinjaman (SRC International) adalah daripada perdana menteri dan menteri kewangan yang bertanggungjawab terhadap KWAP dan beliau adalah 'ultimate boss' saya, jadi saya tidak dapat menafikan ada pengaruh tertentu."

"Biarpun begitu, sama ada mempunyai pengaruh atau tidak, saya tidak akan melakukan sesuatu yang melanggar undang-undang," kata saksi pendakwaan ke-38 itu.

Pada 4 Julai dan 8 Ogos tahun lalu, Najib, 66, mengaku tidak bersalah di atas pertuduhan tiga pertuduhan pecah amanah, satu pertuduhan salah guna kedudukan dan tiga pertuduhan pengubahan wang haram berhubung dana SRC International

4. Sekretariat Suara Rakyat buat laporan SPRM terhadap Menteri Kabinet

LOKMAN Noor Adam mengadakan sidang akhbar sebelum membuat laporan SPRM ke atas Menteri Hal Ehwal Ekonomi, Datuk Seri Mohamed Azmin Ali.

PUTRAJAYA - Sekretariat Suara Rakyat hari ini membuat laporan Suruhanjaya Pencegahan Rasuah Malaysia (SPRM) berhubung dokumen pemindahan dana berjumlah AS\$741,440 yang dipercayai ke akaun penama seorang Menteri Kabinet.

Pengerusinya, Datuk Lokman Noor Adam berkata, beliau memperoleh dokumen itu daripada seorang individu pada malam tadi berhubung pemindahan dana oleh satu syarikat ke dalam akaun di luar negara yang bertarikh 19 Disember 2017.


Katanya, tidak ada sebab munasabah untuk syarikat berkenaan bagi memindahkan wang sebanyak itu ke akaun individu tersebut yang sebelum ini merupakan seorang pemimpin di kerajaan negeri.

"Laporan ini saya buat untuk memberi peluang kepada Ketua Pesuruhjaya SPRM yang baharu, Latheefa Koya agar tiada memihak mana-mana pihak dan bersikap neutral untuk menyiasat sesiapa juga walaupun daripada kelompok politik sama.

"Kita berharap satu keajaiban agar Latheefa untuk menyiasat dan jika benar pemindahan itu berlaku, kita berharap SPRM akan hantar kertas siasatan kepada Jabatan Peguam Negara dan terpulang kepada Peguam Negara untuk ambil tindakan seterusnya," katanya dalam sidang akhbar di pekarangan Ibu Pejabat SPRM di sini hari ini.

Sementara itu, Lokman juga membuat laporan di Ibu Pejabat Polis Daerah (IPD) Putrajaya mengenai penyebaran rakaman video lucu yang mirip seorang ahli politik tempatan.

Katanya, polis digesa melakukan siasatan bagi menyiasat kesahihan video tersebut termasuk mengambil tindakan undang-undang kepada individu yang menyebarkan, yang berlakon dan yang menghasilkan video itu.

5. Laporan SPRM siasat agensi kawal selia perlombongan bijih besi di Kuala Koh

SHAFIE Dris (tengah) bersama Muhammad Sha'ani Abdullah (kiri) menunjukkan laporan yang dibuat di pejabat Suruhanjaya Pencegahan Rasuah Malaysia (SPRM) Temerloh mengenai perlombongan besi di Kuala Koh, Gua Musang Kelantan, hari ini.

TEMERLOH - Pertubuhan Jaringan Kampung Orang Asli Pahang dan Pertubuhan Rangkaian Pembangunan Kesinambungan Malaysia membuat laporan kepada Suruhanjaya Pencegahan Rasuah Malaysia (SPRM) terhadap aktiviti perlombongan yang dikatakan tidak sah berhampiran Kampung Orang Asli Kuala Koh, Gua Musang Kelantan.

Laporan itu dibuat di pejabat SPRM Temerloh oleh Ahli Jawatankuasa Jaringan Kampung Orang Asli Pahang, Shafie Dris dan Pengerusi Pertubuhan Rangkaian Pembangunan Berkesinambungan Malaysia, Muhammad Sha'ani Abdullah.

Shafie berkata, pihaknya menggesa SPRM segera melakukan siasatan ke atas semua agensi terlibat dalam memantau aktiviti perlombongan yang didakwa melanggar peraturan ditetapkan.

"Kita hendak siasatan ke atas agensi mana yang gagal memantau perlombongan itu berlaku kerana cara perlombongan itu bahaya ia mencemari semua sumber-sumber air sekitar.

"Memang ada kegagalan agensi kawal selia, itu yang kami hendak tekankan supaya SPRM siasat semua pegawai awam agar lebih bertanggungjawab dalam melaksanakan tugas mereka," katanya di sinihari ini.

Menurutnya, meskipun kematian ramai masyarakat Orang Asli berhampiran masih belum disahkan puncanya tetapi dia percaya ia turut disebabkan pencemaran.

Katanya, perlombongan bijih besi dalam skala besar yang didakwa dilakukan tanpa langkah-lankah keselamatan termasuk pembinaan kolam penahan menyebabkan air sungai mudah tercemar.

6. Isu projek di Lot 7176, penduduk Taman Midah lapor SPRM

TAN KOK WAI (tiga dari kanan) bersama sebahagian penduduk Taman Midah ketika menyerahkan laporan mengenai projek di Lot 7176 di bangunan SPRM Jalan Cochrane, Kuala Lumpur, hari ini.

KUALA LUMPUR - Satu laporan kepada Suruhanjaya Pencegahan Rasuah Malaysia (SPRM) dibuat penduduk sekitar Taman Midah di sini hari ini berhubung projek bangunan 50 tingkat di atas Lot 7176 yang sedang dalam pembinaan.

Ahli Parlimen Cheras Tan Kok Wai berkata, laporan itu dibuat susulan laporan Ahli Parlimen Kepong, Lim Lip Eng pada 17 Oktober tahun lalu berhubung projek tersebut didakwa antara yang tersenarai di bawah 64 penjualan tanah milik kerajaan.

"Hari ini saya bersama Sekretariat Penduduk Taman Midah Memprotes Pembangunan Arte Cheras (SPTMMPAC) menyerahkan laporan baharu kepada SPRM berkenaan projek tersebut yang diragui status penjualan tanah dan kelulusan pembangunan.

"Kami telah melakukan semakan dan memperoleh beberapa fakta meragukan termasuk pindah hak milik status tanah lapang kepada komersial yang tidak boleh dipindah milik, dipajak, dicagar atau digadai tanpa kebenaran Jawatankuasa Kerja Tanah Wilayah Persekutuan Kuala Lumpur," katanya di sini hari.

7. Penguat kuasa MBPJ terima suapan?

SEBUAH video tular di media sosial memaparkan pegawai penguat kuasa MBPJ menerima suapan dari pemilik sebuah kedai di pusat beli-belah di Kelana Jaya, baru-baru ini.

KUALA LUMPUR - Beberapa anggota penguatkuasa Majlis Bandaraya Petaling Jaya (MBPJ) yang disyaki terlibat dalam kes meminta suapan di sebuah pusat beli-belah di Kelana Jaya, Selangor diarah berhenti menjalankan tugas di luar pejabat. Pengurus Jawatankuasa Kerajaan Tempatan, Pengangkutan Awam dan Pembangunan Kampung Baru Selangor, Ng Sze Han berkata, siasatan dalaman sedang dijalankan terhadap anggota penguat kuasa terbabit.

"Kerajaan Selangor tidak akan berkompromi terhadap sebarang kelakuan rasuah, penyelewengan dan penyalah gunaan kuasa di pentadbiran negeri ini. "Kami mengalu-alukan penglibatan SPRM untuk menyiasat kes tersebut dan MBPJ sudah diarah untuk memberi kerjasama sepenuhnya kepada agensi tersebut," katanya dalam satu kenyataan di sini hari ini.

Beliau berkata demikian bagi mengulas tindakan pengusaha perniagaan di sebuah pusat beli-belah yang membuat laporan ada pegawai penguat kuasa meminta rasuah sebagai dorongan untuk tidak mengeluarkan saman terhadap mereka. Laporan itu dibuat di ibu pejabat Suruhanjaya Pencegahan Rasuah Malaysia (SPRM) Selangor hari ini oleh salah seorang pengusaha perniagaan yang mewakili tiga peniaga lain. Sebuah video tular di media sosial hari ini yang memperlihatkan pegawai penguat kuasa MBPJ menerima wang dari sebuah kedai di pusat beli-belah itu dalam satu kejadian yang dipercayai berlaku seminggu sebelum Hari Raya Aidilfitri.

Dalam klip video selama 15 saat itu, juruwang kedai itu dilihat menyerahkan wang yang dibungkus dengan sekeping kertas putih kepada anggota pihak berkuasa berkenaan.

Sementara itu, MBPJ ketika dihubungi berkata, pihaknya akan mengeluarkan satu kenyataan berhubung kejadian itu pada esok.

8. Dua eksekutif dikaitkan kes 1MDB dipenjara

RIYADH 16 Jun - Dua orang eksekutif yang dikaitkan dengan skandal 1Malaysia Development Berhad (1MDB), dijatuhi hukuman penjara oleh sebuah mahkamah di Abu Dhabi.

Lapor Bloomberg, Khadem al Qubaisi yang sebelum ini pernah mengetuai syarikat International Petroleum Invention Co. (IPIC) di Abu Dhabi, dijatuhi hukuman penjara selama 15 tahun.

Selain itu, Mohammed Badawy al-Husseiny, seorang rakyat Amerika Syarikat (AS) yang menjalankan operasi syarikat subsidiari IPIC, turut dijatuhi hukuman penjara selama 10 tahun.

Memetik laporan Wall Street Journal (WSJ) yang biasa dengan kes itu berkata, kedua-dua tertuduh perlu membayar denda sebanyak AS\$336 juta (RM1.4 bilion).

Menurut sumber dalaman mahkamah, hukuman tersebut tidak mempunyai kaitan dengan skandal 1MDB.

Peguam kepada kedua-dua tertuduh dan wakil Mahkamah Jenayah Abu Dhabi enggan memberi sebarang komen.

Tahun lalu, IPIC dan Aabar Investments didakwa di mahkamah selepas Goldman Sachs Group Inc dikatakan memberi rasuah kepada beberapa bekas pegawai kewangan kedua-dua syarikat terbabit.

Mereka sebagai pertukaran 'bersetuju untuk memanipulasi dan memperdaya IPIC dan Aabar serta menyalahgunakan nama syarikat, rangkaian dan infrastruktur untuk melakukan jenayah dan kepentingan peribadi'.

19 Jun 2019

9. Penolong jurutera JPS, kontraktor buat tuntutan palsu direman

PEGAWAI SPRM membawa masuk dua lelaki bagi mendapat perintah reman atas tuduhan membuat tuntutan palsu berjumlah RM720,000 di Mahkamah Majistret di Ipoh hari ini.

IPOH - Suruhanjaya Pencegahan Rasuah Malaysia (SPRM) menahan reman seorang penolong jurutera di Jabatan Pengairan dan Saliran (JPS) Daerah Perak Tengah dan seorang kontraktor setelah dipercayai membuat tuntutan palsu melalui empat sebut harga bagi baik pulih tebing sungai berjumlah RM720,000, tahun lalu.

Perintah tahanan reman selama enam hari bermula hari ini ke atas penolong jurutera berusia 58 tahun dan kontraktor berusia 57 tahun itu dikeluarkan oleh Majistret Nurul Hafizah Mohammad Fauzi di Mahkamah Majistret di sini.

Terdahulu, kedua-dua lelaki yang menaiki kendaraan berasingan itu tiba di perkarangan Kompleks Mahkamah Ipoh pada pukul 11.30 pagi.

Dua lelaki terbabit ditahan antara pukul 7.20 petang hingga 8.20 malam di pejabat SPRM Perak semalam bagi membantu siasatan di bawah Seksyen 18 Akta SPRM 2009.

Difahamkan, kedua-dua mereka terlibat dengan tuntutan yang mengandungi butiran kandungan palsu bagi kerja-kerja baik pulih sungai oleh JPS Daerah Perak Tengah membabitkan empat sebut harga berjumlah hampir RM720,000, tahun lalu.

Bagaimanapun menurut sumber, tiada sebarang kerja-kerja fizikal bagi baik pulih tebing sungai dijalankan sehingga ke hari ini walaupun bayaran penuh kerja telah dibuat dan diterima pihak kontraktor yang dikatakan kroni kepada pegawai dan kakitangan JPS Perak Tengah.

"Kedua-dua lelaki itu bersama dua lelaki lain yang turut ditahan, disyaki telah berpaktat dengan kontraktor untuk membuat tuntutan palsu.

"Bagaimanapun, dua lelaki yang merupakan pegawai kanan JPS berusia 47 tahun dan seorang penolong jurutera berumur 49 tahun telah dilepaskan dengan jaminan SPRM," katanya.

Sementara itu, Pengarah SPRM negeri, Datuk Mohd. Fauzi Mohamad ketika dihubungi mengesahkan mengenai penahanan dua lelaki itu dan memberitahu siasatan lanjut sedang dijalankan. -

19 Jun 2019

10. SPRM Kedah siasat beberapa GLC



SHAHAROM NIZAM ABD. MANAP (berdiri) beramah mesra bersama orang ramai yang hadir pada Rumah Terbuka Raya Suruhanjaya Pencegahan Rasuah Malaysia (SPRM) Kedah di Pejabat SPRM Kedah, Bangunan Persekutuan, Anak Bukit di Alor Setar, Kedah, hari ini.

ALOR SETAR - Suruhanjaya Pencegahan Rasuah Malaysia (SPRM) sedang menjalankan siasatan berhubung penyalahgunaan kuasa dan rasuah yang melibatkan pengurusan atasan di beberapa buah syarikat berkaitan kerajaan (GLC) di negeri ini.

Pengarah SPRM negeri, Datuk Shaharom Nizam Abd. Manap berkata, kes-kes tersebut kini berada dalam pelbagai peringkat sebelum tindakan selanjutnya dilakukan.

"Kes-kes berkenaan akan diagihkan dengan segera iaitu kes mana yang perlu diambil tindakan terlebih dahulu kerana jika lambat dikhuatiri akan menjelaskan siasatan.

"Malah, kita akan memberikan keutamaan untuk melaksanakan siasatan berdasarkan maklumat yang baharu diterima," katanya ketika ditemui pada Majlis Jalinan Mesra Aidilfitri SPRM Kedah, di sini hari ini.

Shaharom Nizam berkata, Kedah kini berada di kedudukan lima teratas dalam penyaluran maklumat yang membuktikan negeri ini aktif berbanding negeri lain.

Mengulas lanjut, beliau berkata, sebanyak 271 maklumat membabitkan pelbagai kes diterima pihaknya sejak awal Januari lalu sehingga semalam.

"Sepanjang tempoh sama, sebanyak 80 tangkapan sudah dibuat manakala 53 kertas siasatan dibuka untuk siasatan.

"Selain itu, sebanyak 11 pertuduhan dibuat membabitkan nilai rasuah melebihi RM1.2 juta di bawah Seksyen 18 dan Akta Pencegahan Pengubahan Wang Haram, Pencegahan Pembiayaan Keganasan dan Hasil Daripada Aktiviti Haram (AMLATFPAAA)," ujarnya.

11. Penguat kuasa digantung lakukan tugas luar - Datuk Bandar PJ

MOHD. SAYUTHI (kanan) melayani tetamu yang hadir sewaktu majlis Rumah Terbuka Aidilfitri MBPJ di Stadium Petaling Jaya, Jalan SS7/15, Kelana Jaya dekat sini, hari ini.

KUALA LUMPUR - Majlis Bandaraya Petaling Jaya (MBPJ) telah mengambil tindakan secara pentadbiran dengan menempatkan penguat kuasa yang didakwa meminta suapan di sebuah pusat beli-belah di Kelana Jaya dekat sini, Isnin lalu dengan melaksanakan kerja-kerja dalaman di pejabat.

Perkara itu disahkan sendiri oleh Datuk Bandar Petaling Jaya, Datuk Mohd. Sayuthi Bakar kepada pemberita ketika majlis Rumah Terbuka Aidilfitri MBPJ di Stadium Petaling Jaya, Jalan SS7/15, Kelana Jaya dekat sini, hari ini.

Mohd. Sayuthi berkata, kes berkenaan masih dalam siasatan oleh Suruhanjaya Pencegahan Rasuah Malaysia (SPRM) dan beliau tidak akan mengulas lebih lanjut sehingga siasatan selesai.

Menurutnya, sama ada akan ada pertuduhan atau tidak ia bergantung kepada siasatan SPRM sendiri.

"Siasatan dalaman masih diteruskan dan saya memerlukan sedikit masa untuk tindakan seterusnya.

"Ini kerana mereka masih lagi dipanggil untuk memberi keterangan di SPRM," katanya.

Katanya, tindakan serupa dibuat oleh jabatan-jabatan penguat kuasa yang lain bagi memberikan kesedaran kepada mereka dengan menjalankan pemantauan yang lebih ketat kepada individu-individu terlibat.

"Jika mereka didapati terlibat dalam kes ini, kami akan menghantar mereka mengikuti kursus khas, motivasi dan sebagainya bagi meningkatkan integriti diri," katanya.

Ujarnya, MBPJ juga mempunyai sistem kawalan yang lebih efektif untuk mengurangkan dan mengelakkan anggota penguat kuasa dalam melakukan kesalahan-kesalahan yang boleh melibatkan pelanggaran integriti. -

21 Jun 2019

12. Lebih ramai dipanggil SPRM bantu siasatan kes tuntutan palsu

PENGARAH SPRM Perak, Datuk Mohd. Fauzi Mohamad (empat dari kiri) dan Ketua Polis Perak, Datuk Datuk Razarudin Husain (tiga dari kanan) bergambar bersama sebahagian tetamu pada Majlis Tautan Kasih SPRM Perak di Meru, Ipoh hari ini.

IPOH - Beberapa lagi individu akan dipanggil Suruhanjaya Pencegahan Rasuah Malaysia (SPRM) untuk membantu siasatan berhubung kes mengemukakan tuntutan palsu berjumlah RM720,000 bagi kerja-kerja membaik pulih sungai tahun lalu.

Pengarah SPRM Perak, Datuk Mohd. Fauzi Mohamad berkata, ia susulan penahanan seorang penolong jurutera di Jabatan Pengairan dan Saliran (JPS) Daerah Perak Tengah dan seorang kontraktor yang dipercayai membuat tuntutan berkenaan.

Katanya, SPRM telah mengenal pasti sekurang-kurangnya lima individu yang mempunyai hubung kait dan maklumat berhubung kes berkenaan untuk tampil membantu siasatan.

"Siasatan kes ini di bawah Seksyen 18 Akta SPRM 2009 masih berjalan dan kita sedang mengumpulkan lebih banyak maklumat.

"Ketika ini dua individu tersebut masih ditahan reman selama seminggu sehingga Rabu depan," ujarnya.

Beliau ditemui pemberita pada Majlis Tautan Mesra SPRM Perak di ibu pejabat agensi itu di Meru di sini hari ini.

Pada Rabu lalu, SPRM Perak menahan seorang penolong jurutera JPS dan seorang kontraktor bagi membantu siasatan kes mengemukakan tuntutan palsu bagi kerja-kerja membaikpulih sungai.

Kedua-dua suspek masing-masing berusia 58 dan 57 tahun itu ditahan ketika hadir memberikan keterangan di Ibu Pejabat SPRM negeri di sini pada malam sebelumnya.

Bagaimana pun tiada sebarang kerja-kerja fizikal membaikpulih dibuat di tapak sehingga ke hari ini dan bayaran penuh kerja sudah dibuat.

Difahamkan SPRM turut menahan dua lagi lelaki yang juga dipercayai terbabit dalam kes berkenaan, namun tidak direman dan dibebaskan dengan jaminan SPRM.

13. 1MDB: Jakel dibayar untuk bekal peralatan kepada masjid

KUALA LUMPUR - Bekas Perdana Menteri, Datuk Seri Najib Tun Razak berkata, sejumlah wang yang dibayar kepada syarikat peruncit tekstil, Jakel Trading Sdn. Bhd. (Jakel) adalah bertujuan untuk membekalkan peralatan seperti kain pelikat, jubah dan bekalan lain kepada lebih 7,000 masjid di seluruh negara.

Beliau berkata, bayaran itu dibuat untuk membekalkan barang berkenaan kepada pertubuhan bukan kerajaan (NGO) dan UMNO untuk diagihkan sempena bulan Ramadan dalam tempoh beberapa tahun berturut-turut.

"Selama ini, media barat dan Kerajaan Pakatan Harapan (PH) pernah tuduh bahawa syarikat Jakel adalah gedung pakaian mewah dan mereka juga memfitnah bahawa saya dan isteri telah belanja sebanyak RM55 juta untuk membeli pakaian dan kain mewah serta mahal dari syarikat ini.

"Tetapi kebenarannya ialah ini adalah bayaran kepada Jakel untuk membekal kain pelikat, Jubah serta bekalan lain melalui NGO dan parti kepada lebih 7,000 masjid di seluruh negara sempena Ramadan untuk beberapa tahun berturut-turut," katanya dalam ciapan di laman akaun Facebook miliknya hari ini.

Suruhanjaya Pencegahan Rasuah Malaysia (SPRM) hari ini memfailkan permohonan perlucutan sivil terhadap 41 individu dan entiti untuk mendapatkan kembali RM270 juta wang yang dikatakan daripada 1Malaysia Development Berhad (1MDB), yang dipindahkan ke akaun bank Najib dan kemudian ke penerima berkenaan, termasuk Jakel.

Dalam pada itu, Najib berkata, dakwaan SPRM yang mengaitkan Jakel sebagai pihak yang menerima dana haram disifatkan sebagai 'janggal' kerana syarikat tersebut hanya membekal barang keperluan kepada UMNO dan NGO bagi program kebajikan.

"Dana tidak disumbang kepada Jakel tetapi ianya adalah bayaran kepada mereka untuk pembelian.

"Saya memilih untuk menggunakan baginya bagi projek kebajikan rakyat secara terus, melalui NGO dan melalui parti politik yang menganjurkan program-program kebajikan mereka," jelasnya.

Sementara itu, beliau juga berpendapat bahawa langkah SPRM yang bertindak memfailkan permohonan tersebut adalah bermotifkan politik untuk melemahkan pembangkang.

"Setelah disiasat selama satu tahun, SPRM tidak dapat mendakwa sebarang penerima dengan kes jenayah. Oleh itu, kerajaan PH terpaksa menggunakan saman sivil," ujarnya

14. Kilang plastik bungkus semula baja subsidi diserbu

PEGAWAI Penguat kuasa Kementerian Perdagangan Dalam Negeri dan Hal Ehwal Pengguna (KPDNHEP), Kamal Reza Kamal Pasha (kiri) bersama Mohd. Yazid Azmi memeriksa baja subsidi yang telah dibungkus semula sebelum dijual ke seluruh negara ketika serbuan Suruhanjaya Pencegahan Rasuah (SPRM) Putrajaya bersama KPDNHEP di sebuah kilang yang disyaki terlibat dalam kegiatan menjual semula baja subsidi di Jalan Simpang Empat Sedaka di Yan, Kedah, hari ini.

YAN - Berselindung di sebalik kilang plastik, sebuah gudang haram di Guar Chempedak, di sini diserbu penguat kuasa selepas disyaki terlibat dalam kegiatan menjual semula baja subsidi yang diperoleh daripada petani dalam Op Tabur yang dilakukan, hari ini.

Modus operandinya adalah dengan membeli baja kimia tersebut yang berkapasiti 25 kilogram (kg) pada harga antara RM10 ke RM15 sekampit sebelum membungkus semula dalam kampit seberat 50kg untuk dijual pada harga lebih RM100.

Berdasarkan siasatan awal, baja-baja itu dijual ke seluruh negara dengan pengusahaannya memperoleh keuntungan berlipat kali ganda.

Malah, ia bukan kali pertama pihak tidak bertanggungjawab itu terbabit dalam kegiatan berkenaan kerana sebuah kilangnya di lokasi berdekatan, sebelum ini pernah diserbu penguat kuasa tahun lalu yang membabitkan rampasan bernilai kira-kira RM3 juta.

Kali ini, dalam serbuan diketuai Suruhanjaya Pencegahan Rasuah Malaysia (SPRM) Putrajaya bersama-sama Kementerian Perdagangan Dalam Negeri dan Hal Ehwal Pengguna (KPDNHEP) serta Kementerian Pertanian dan Industri Asas Tani, sebanyak 96,000kg baja itu berjaya dirampas.

Rampasan tersebut dianggarkan mencecah RM250,000 termasuk baja berjenama lain dan sebuah treler yang dalam proses untuk menghantar bekalan berkenaan ke pasaran.

Kes disiasat dibawah Peraturan 3(1) Akta Kawalan Bekalan 1961 kerana memiliki barang kawalan tanpa kebenaran dan Seksyen 20 akta sama kerana mengalih barang kawalan.

Seorang lelaki tempatan berusia 36 tahun yang dipercayai pemilik gudang tersebut turut ditahan untuk dirakam keterangan bagi membantu siasatan.

Difahamkan, kilang itu juga tidak memiliki lesen pemberong dan beroperasi tanpa mengira masa terutamanya selepas memperoleh baja subsidi daripada para petani.



PEGAWAI Penguin kuasa Kementerian Perdagangan Dalam Negeri dan Hal Ehwal Pengguna (KPDNHEP) memeriksa baja subsidi berkapasiti 25 kilogram (kg) sekampit yang diperoleh dari petani sebelum dibungkus semula dalam kampit seberat 50 kg dan dijual semula ke seluruh negara ketika serbuan Suruhanjaya Pencegahan Rasuah (SPRM) Putrajaya bersama KPDNHEP di sebuah kilang yang disyaki terlibat dalam kegiatan menjual semula baja subsidi di Guar Chempedak di Yan, Kedah, hari ini.

Pengarah Bahagian Penguin Kuasa Kementerian Perdagangan Dalam Negeri dan Hal Ehwal Pengguna (KPDNHEP), Datuk Iskandar Halim Sulaiman mengesahkan kes tersebut.

Dalam pada itu, Jabatan Imigresen yang turut menyertai operasi tersebut menahan empat lelaki warga Pakistan berusia antara 18 hingga 27 tahun yang bekerja di kilang membungkus baja itu kerana melanggar syarat permit.

24 Jun 2019

15. Dua anggota Maritim terima rasuah bulanan diberkas

DUA anggota Maritim Malaysia dibawa ke Mahkamah Alor Setar untuk mendapatkan perintah tahanan reman di Alor Setar, Kedah, hari ini.

ALOR SETAR - Tanda tanya tentang pengusaha bot nelayan yang sering kali menceroboh ke zon tidak dibenarkan khususnya untuk nelayan kecil di pesisir pantai akhirnya terjawab apabila dua anggota Agensi Penguatkuasaan Maritim Malaysia (Maritim Malaysia) ditahan kerana disyaki meminta dan menerima rasuah secara bulanan daripada golongan tersebut di Kuala Kedah, di sini sejak tiga tahun lalu.

Kedua-dua lelaki berusia 44 tahun yang berpangkat Bintara Muda Maritim itu ditahan di pejabat Suruhanjaya Pencegahan Rasuah Malaysia (SPRM) di sini, kira-kira pukul 5.30 petang semalam.

Kedua-dua mereka dibawa ke Kompleks Mahkamah Alor Setar hari ini untuk mendapatkan perintah tahanan reman.

Penolong Kanan Pendaftar Mahkamah Alor Setar, Noor Lyana Ab. Rahim membenarkan kedua-dua suspek direman selama tujuh hari bermula hari ini.

Menurut sumber, dua anggota penguasa itu didakwa meminta dan menerima rasuah antara RM200 hingga RM2,000 daripada nelayan dan pemilik bot sebagai balasan supaya tidak diambil tindakan kerana melanggar kesalahan di bawah Akta Perikanan.

Kesalahan yang dilakukan nelayan antaranya menceroboh kawasan penangkapan ikan.

Sementara itu, Pengarah SPRM negeri, Datuk Shaharom Nizam Abd. Manap ketika dihubungi mengesahkan penahanan kedua-dua anggota penguasa berkenaan.

Kes disiasat mengikut Seksyen 17(a) Akta SPRM 2009.

Sebelum ini, nelayan pesisir pantai di daerah Kuala Kedah sering kali merungut apabila pengusaha bot kelas B1 menangkap ikan di luar zon yang dibenarkan iaitu kurang 14.4 kilometer dari pesisir pantai sehingga menjelaskan pendapatan mereka.

16. CEO syarikat pembersihan, ketua jabatan kontrak ditahan kes rasuah kontraktor

KETUA pegawai eksekutif (CEO) (belakang, tengah) serta ketua jabatan kontrak dan perolehan (depan, tengah) sebuah syarikat konsesi pengurusan sisa pepejal dan pembersihan awam diiringi anggota Suruhanjaya Pencegahan Rasuah Malaysia (SPRM) untuk mendapatkan perintah tahanan reman kerana disyaki menerima rasuah daripada kontraktor sejak empat tahun lalu di Kompleks Mahkamah Alor Setar di Kedah, hari ini.

ALOR SETAR - Seorang ketua pegawai eksekutif (CEO) serta ketua jabatan kontrak dan perolehan sebuah syarikat konsesi pengurusan sisa pepejal dan pembersihan awam di negeri ini dan Perlis ditahan kerana disyaki menerima rasuah daripada kontraktor sejak empat tahun lalu.

Kedua-dua individu berusia 50 dan 34 tahun itu ditahan di pejabat Suruhanjaya Pencegahan Rasuah Malaysia (SPRM) negeri, di sini kira-kira pukul 6.30 petang, semalam.

Menurut sumber, penahanan kedua-duanya itu susulan bantahan beberapa pihak termasuk kontraktor yang tidak berpuas hati kerana mendakwa pengagihan kontrak diberikan kepada kroni CEO terbabit.

Malah, penyelewengan dalam proses tender itu menyebabkan syarikat-syarikat yang tidak memenuhi syarat ditetapkan seperti memiliki pekerja dan lori-lori mencukupi terpilih untuk melakukan kerja.

"Syarikat yang memenuhi syarat pula tidak dipilih dan mereka sebaliknya dikehendaki menjalankan kerja-kerja pengutipan sisa pepejal sebagai sub kontraktor kepada pihak yang mendapat tender terbabit.

"Anggaran projek bagi pengurusan sisa pepejal di negeri ini dan Perlis berjumlah RM360 juta setahun," kata sumber di sini hari ini.

Sumber itu menambah, individu terlibat dan beberapa pihak juga didakwa menujuhkan satu tabung kelab kononnya bagi menjaga kebajikan syarikat-syarikat terlibat.

"Semua kontraktor yang berjaya dalam tender diwajibkan untuk menyumbang antara satu hingga dua peratus daripada nilai projek ke dalam tabung itu. Dianggarkan sebanyak RM3.6 juta disumbangkan ke dalam tabung tersebut setiap tahun," dakwanya.

Ujar sumber itu lagi, tabung tersebut disyaki digunakan sebagai kaedah mengutip wang rasuah daripada kontraktor bagi mengaburi mata pihak berkuasa.

"Hasil risikan selama lebih enam bulan mendapati tabung itu telah disalahgunakan untuk membeli harta, kenderaan dan lawatan peribadi ke luar negara," tambahnya.

Kedua-dua individu tersebut kini direman selama empat hari bermula hari ini.

Sementara itu, Timbalan Ketua Pesuruhjaya (Operasi) SPRM, Datuk Seri Azam Baki mengesahkan penahanan tersebut dan kes disiasat di bawah Seksyen 16 Akta SPRM 2009.

17. Ahmad Zahid selesai beri keterangan di SPRM**AHMAD ZAHID HAMIDI**

PUTRAJAYA - Bekas Timbalan Perdana Menteri, Datuk Seri Dr. Ahmad Zahid Hamidi meninggalkan Ibu Pejabat Suruhanjaya Pencegahan Rasuah Malaysia (SPRM) di sini hari ini selepas tiga jam memberi keterangan.

Menurut sumber, Ahli Parlimen Bagan Datuk itu dipercayai meninggalkan pekarangan ibu pejabat suruhanjaya itu kira-kira pukul 12.30 tengah hari tadi.

Jelas sumber, Ahmad Zahid telah keluar dari pekarangan SPRM dengan menaiki kereta peguamnya.

Walau bagaimanapun, pihak media tidak menyedari beliau telah meninggalkan SPRM dan hanya mendapat maklumat mengenai perkara berkenaan kira-kira pukul 5 petang ini.

Terdahulu, Presiden UMNO itu dipercayai tiba di SPRM pada pukul 9.30 pagi dengan menaiki kenderaan pelbagai guna (MPV) jenis Toyota Vellfire berwarna hitam.

Menurut sumber, beliau dijangka dihadapkan ke mahkamah dalam masa terdekat dan berdepan pertuduhan mengikut Seksyen 16 (a) Akta Suruhanjaya Pencegahan Rasuah Malaysia (SPRM) 2009.

Pertuduhan dijangka dilakukan di dua mahkamah iaitu Mahkamah Jalan Duta dan Mahkamah Shah Alam kerana perbuatan itu berlaku di dua lokasi berkenaan.

Siasatan awal mendakwa bekas Menteri Dalam Negeri itu menerima sejumlah wang sogokan daripada sebuah syarikat yang digunakan untuk tujuan peribadi.

Untuk rekod, syarikat berkenaan adalah syarikat yang diberi hak eksklusif oleh Kementerian Dalam Negeri pada 2016 bagi mengendalikan Sistem Visa Luar Negara (VLN) atas talian termasuk eNTRI dan eVISA untuk pelancong China yang ingin datang ke Malaysia.

Menurut laporan akhbar, sejak eNTRI diperkenalkan pada Mac 2016 hingga September 2018, syarikat itu sudah mengutip lebih RMB329,337,280 (RM198,066,952) membabitkan kelulusan permohonan kepada 2,058,358 orang, namun tapisan keselamatan dilakukan amat lemah sehingga kelulusan diberikan kepada seekor beruk yang diberikan identiti palsu.

Syarikat itu juga diberi hak memungut fi iaitu RMB160 atau RM100 untuk satu permohonan tanpa sedikitpun menjadi hasil kerajaan.

26 Jun 2019

18. Zahid didakwa atas tujuh pertuduhan terima suapan

KUALA LUMPUR 26 Jun - Presiden UMNO, Datuk Seri Dr. Ahmad Zahid Hamidi didakwa sekali lagi di Mahkamah Sesyen di sini hari ini dan kali ini dengan tujuh pertuduhan menerima suapan lebih SGD4.2 juta daripada sebuah syarikat pengendali perkhidmatan pusat sehenti di China dan Sistem Visa Luar Negara (VLN), dua tahun lalu.

Bekas Timbalan Perdana Menteri berusia 66 tahun itu bagaimanapun mengaku tidak bersalah selepas semua pertuduhan terhadapnya selesai dibacakan di hadapan Hakim Azura Alwi.

Mengikut semua pertuduhan, beliau didakwa secara rasuah menerima suapan daripada syarikat Ultra Kirana Sdn. Bhd.

Ia sebagai dorongan untuk tertuduh yang ketika itu menjawat jawatan sebagai Menteri Dalam Negeri di Kementerian Dalam Negeri untuk melanjutkan kontrak syarikat berkenaan.

Perbuatan tersebut didakwa dilakukan di Seri Satria, Presint 16, Putrajaya dekat sini antara 28 Mac 2017 dan 2 Mac 2018.

Kesemua pertuduhan tersebut dikemukakan mengikut Seksyen 16(a)(B) Akta Suruhanjaya Pencegahan Rasuah Malaysia (SPRM) 2009 dan boleh dihukum di bawah Seksyen 24(1) akta sama yang memperuntukkan hukuman penjara maksimum 20 tahun dan denda tidak kurang lima kali ganda jumlah atau nilai suapan atau RM10,000 mengikut yang mana lebih tinggi.

Turut hadir dalam prosiding itu ialah bekas Perdana Menteri, Datuk Seri Najib Tun Razak, Ketua Pesuruhjaya SPRM, Latheefa Koya, Timbalan Ketua Pesuruhjaya (Operasi) SPRM, Datuk Seri Azam Baki, dan Ketua Pemuda UMNO, Datuk Dr. Asyraf Wajdi Dusuki.

Pada 19 Oktober dan 14 Disember 2018 serta 20 Februari lalu, Ahli Parlimen Bagan Datuk itu mengaku tidak bersalah terhadap 47 pertuduhan dengan 12 pertuduhan pecah amanah, lapan pertuduhan rasuah dan 27 pengubahan wang haram melibatkan puluhan juta ringgit milik Yayasan Akalbudi.

29 Jun 2019

19. 'Kalau RM1, RM2 logik lah tidak tahu'

MUHAMMAD SANUSI MOHD. NOR ketika berucap pada program ceramah penyatuan ummah di Padang Taman Sena, Labu Besar, Kulim, Kedah, malam tadi.

KULIM - Jawapan Datuk Seri Mukhriz Mahathir yang tidak tahu mengenai dana daripada 1Malaysia Development Berhad (1MDB) yang disalurkan ke akaun UMNO Kedah semasa beliau menjadi Pengerusi Badan Perhubungan parti itu sungguh menghairankan.

Timbalan Pesuruhjaya Pas negeri, Muhammad Sanusi Mohd. Nor berkata, adalah mustahil Mukhriz sebagai Pengerusi UMNO Kedah pada masa itu tidak tahu mengenai kemasukan wang yang dikatakan mencecah jutaan ringgit.

"Kalau duit masuk RM1 atau RM2 tidak apalah sekiranya tidak tahu. Ini UMNO Kedah pada masa itu dikatakan terima lebih RM1 juta, dia (Mukhriz) boleh kata tidak tahu," katanya ketika berceramah dalam program penyatuan ummah di Padang Taman Sena, Labu Besar di sini, malam tadi.

Yang turut hadir, Presiden UMNO, Datuk Seri Dr. Ahmad Zahid Hamidi; Pengerusi Badan Perhubungan UMNO negeri, Datuk Seri Jamil Khir Baharom; Pendakwah, Ahmad Husam Baderudin dan pemimpin-pemimpin setempat.

Baru-baru ini, Mukhriz yang pernah memegang jawatan sebagai Pengerusi Badan Perhubungan UMNO negeri sebelum ini, mengakui tidak tahu mengenai dana 1MDB yang disalurkan ke akaun UMNO Kedah.

Beliau yang juga Menteri Besar dilaporkan berkata, segala urusan berkaitan dana ketika itu diserahkan sepenuhnya kepada Bendahari UMNO negeri, Datuk Seri Abdul Azeez Abdul Rahim.

Sebelum itu, Ketua Pengarah Suruhanjaya Pencegahan Rasuah Malaysia (SPRM), Latheefa Koya mengumumkan agensi itu telah memfailkan permohonan di bawah Akta Pencegahan Pengubahan Wang Haram dan Pencegahan Pembiayaan Keganasan 2001 (AMLA) untuk lucut hak bagi tujuan mendapatkan semula wang-wang yang mengalir keluar dari salah guna kes 1MDB.

Pihak SPMR sudah mengenal pasti 41 orang individu dan entiti yang menjadi responden kepada permohonan tersebut.

Menerusi tuntutan tersebut agensi itu mahu menuntut semula wang sebanyak RM270 juta yang dikatakan telah diberikan kepada pelbagai pihak termasuk Badan Perhubungan UMNO Kedah.

Tambah Muhammad Sanusi, selain Mukhriz, Tan Sri Muhyiddin Yassin dan Datuk Seri Mohd. Shafie Apdal juga masing-masing pernah menjadi Pengerusi UMNO Johor dan Sabah yang dikatakan turut menerima dana 1MDB.

"Bagaimanapun Lim Guan Eng (Menteri Kewangan) sudah memaklumkan mereka tidak terima. Kawan dia buat apa pun tidak apa meskipun Kedah, Sabah dan Johor ada dalam senarai," katanya.

20. Buktikan dahulu dana RM270 juta dari 1MDB

AHLI Majlis Tertinggi UMNO, Datuk Seri Reezal Merican Naina Merican ketika berucap pada majlis perasmian Mesyuarat Perwakilan Pergerakan Pemuda Umno Bahagian Bukit Gantang di Simpang, Taiping.

BUKIT GANTANG 30 Jun - Kerajaan perlu membuktikan dana RM270 juta yang didakwa dipindahkan daripada akaun bank bekas Perdana Menteri, Datuk Seri Najib Tun Razak adalah bersumberkan dari 1Malaysia Development Bhd (1MDB).

Ahli Majlis Tertinggi UMNO, Datuk Seri Reezal Merican Naina Merican berkata, perkara itu seharusnya dibuktikan terlebih dahulu selari dengan prinsip 'rule of law' sebelum Suruhanjaya Pencegahan Rasuah Malaysia (SPRM) memfailkan permohonan perlucutan hak sivil terhadap 41 responden.

"Kalau tidak dibuktikan, macam mana boleh buat perlucutan hak sivil melainkan ini adalah satu lagi 'political window dressing', maknanya hanya muhamsensasikan berkaitan dengan penerima-penerimanya bahawa ini adalah duit daripada 1MDB.

"Kalaularah ditakdirkan duit itu bukan sumbernya dari 1MDB, apakah duit itu bukan halal? Jadi, buktikan yang itu dulu kerana kes Datuk Seri Najib berkaitan 1MDB pun tidak mula lagi, yang bermula adalah kes SRC International Sdn Bhd," katanya.

Beliau berkata demikian ketika ditemui selepas merasmikan Mesyuarat Perwakilan Pergerakan Pemuda UMNO Bahagian Bukit Gantang di Dewan UMNO Bukit Gantang di sini hari ini.

Hadir sama Pemangku Ketua UMNO Bahagian Bukit Gantang, Mohd Kamaruddin Abu Bakar; Ketua Pemuda UMNO Perak, Mohd. Ariff Abdul Majid dan Ketua Pemuda UMNO Bukit Gantang, Mohammad Sollehin Mohamad Tajie.

Reezal Merican diminta mengulas mengenai tindakan pihak tertentu yang bertindak cuba mengharamkan UMNO apabila menggesa Jabatan Pendaftaran Pertubuhan (ROS) mengambil tindakan terhadap parti itu setelah mengaitkannya dengan penyelewangan dana 1MDB.

Dalam pada itu, Reezal Merican berkata, adalah penting untuk dakwaan tersebut disahkan dahulu ekoran tidak masuk akal apabila sabitan sesuatu kes dilakukan tanpa perkara pokoknya ditentukan terlebih dahulu.

Sehubungan itu, beliau merasakan tindakan itu merupakan suatu gerakan taktikal yang dilakukan oleh pihak kerajaan.

"Sebabnya kalau benda itu dipulangkan semula (akaun UMNO yang dibekukan), ia seakan-akan memberi pengiktirafan bahawa memang tiada kes," katanya.